

四庫全書

集部

欽定四庫全書

集部
泊菴集卷二

詳校官檢討_臣羅國俊

中書_臣劉源溥覆勘

總校官編修_臣王燕緒
校對官編修_臣嚴福
謄錄監生_臣謝雲

欽定四庫全書

集部六

泊菴集

別集類五

明

提要

臣等謹案泊菴集十六卷明梁潛撰潛字用

之泰和人洪武丙子舉人授蒼溪訓導歷知

四會陽江陽春三縣永樂初召修太祖實錄

累遷右春坊右贊善會修永樂大典代禮部

尚書鄭賜為總裁陞侍讀永樂十五年北征

仁宗監國以釋陳千戶事牽連坐死事迹附見明史鄒濟傳是集前有王直胡儼二序儼序稱為潛子黎所編考蕭鎡尚約居士集有陳循墓誌稱梁公潛以職務違錯被逮且籍之梁平日所作詩文悉估書冊賣錢入官循遣人訪求倍價贖還今鈔梓以傳者循所贖也云云則其稿為潛所自編因循而傳于世儼序不載其事而但稱其文章遭際蓋諱言

其賜死耳潛文格清雋而無有縱橫浩瀚之
氣在明初可自成一隊故鄭瑗并觀瑣言稱
其豐贍委曲亦當代一作家楊士奇作潛墓
誌稱其為文章馳騁司馬子長韓退之蘇子
瞻亦間出莊列為奇務去陳言出新意古詩
高處逼晉宋此本有文無詩集末有康熙辛
酉潛裔孫天清續刻家集小引云泊庵公詩
集已瘞文冢不復存人間則舊本久佚矣乾

隆四十六年十月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

泊菴集序

梁先生之沒既二十五年其子候官令叔蒙刑部員外郎叔車編次遺文為十六卷屬直為之序直與先生居同里且有連少從先生遊而辱教為多其何敢辭先生於泰和為儒家代以文學顯至先生尤俊邁不羣嘗從直之叔祖僉憲公子啟受詩經而其伯舅陳公仲述亦以古文有盛名先生皆獲承教凡經史百氏之書無不究而於左氏傳司馬史記班固漢書每注意焉性命道

德之與文章著述之妙多其所自得而充之以奇氣發之以逸才沛然莫之能禦遂以文名搢紳間同游雖多獨與少師楊公士奇最相好有麗澤之益永樂初修高廟實錄先生徵自縣令與執筆其間據事直書精切詳雅書成授官翰林及修永樂大典又命先生為總裁該貫古今細大畢錄時太宗皇帝在位德化大行天地清寧民物咸遂華夏蠻貊罔不率俾和氣充溢嘉祥荐臻文學侍從之臣皆形諸歌頌及朝廷有所述作先生與

二三閣老實冠絕一時四方求文字者必求之先生蓋
先生之文溫厚和平而豪壯迭宕之勢寓焉如江河之
流汪洋衍迤一與風遇則波瀾勃興魚龍百怪出沒隱
見可喜可愕真當代之傑作也仁宗皇帝在東宮監國
雅知先生而親任焉嘗賜詩以寵之先生孝友忠信平
易正直而言行必由道其在侍近夙夜敬恭竭誠無隱
凡所言於仁宗者皆本於仁義他非所及也竊嘗論之
天之生賢以文行名世如先生者實關乎世道不偶然

也當國家興運之時清明純厚之氣始復而先生得之以生加以世澤之隆師友之懿篤志力學遂為名儒鋪張肇造之洪休贊詠繼明之偉烈勒之金石傳之後世而其餘力又以足夫天下之人之所欲於乎是豈偶然者哉先生名潛字用之泊菴其號也初舉鄉貢進士為菴溪訓導以言天下大計擢為令歷四會陽江陽春皆有治聲遂入翰林為修撰陞侍讀兼春坊贊善而終孟子曰誦其詩讀其書不知其人可乎是以論其世也直

故詳而書之以為文集序使讀者有考焉里生王直序

欽定四庫全書

泊菴集卷一

明 梁潛 撰

應制

騶虞詩

有序

臣聞自古聖帝明王至治之極必有禎祥若麒麟鳳凰
醴泉甘露應時而產皆所以符聖徵彰至德者也乃永
樂二年秋八月皇帝冢弟周王畋于釣州厥有異獸白

質黑章猊首虎軀其狀孔威不可迫視王俾部曲俟之
其性孔仁遂擾致之以詢之故老蓋古所謂騶虞者此
其是已夫惟人君有至信之德則見於是九月丁未王
率厥屬表獻闕下皇帝服皮弁服御奉天殿以觀不震
不動柔伏自然皇帝若曰厥為嘉瑞予罔敢知惟致自
昆弟之邦予其嘉焉於是太子太師淇國公臣丘福謹
率百官上千萬歲壽既而京師人士忻喜聚觀咸以為
聞自古昔見始今茲臣潛伏覩盛典不敢自默退而考

之騶虞咏於詩記於禮列於傳記或以為義獸或曰仁
獸或曰聖獸至以為嘉祥者則其言皆同也傳曰國家
將興必有禎祥洪惟皇帝紹登大寶率由舊章親親而
仁民恩沛而義洽萬方咸和以及乎庶類禾同穎於郊
蠶成繭於野文犀白象諸福之物抑之而愈臻却之而
復至何其盛也豈非上天以是昭至德哉臣潛忝職記
注苟不形之歌詠以垂示無窮厥為不職謹百拜稽首而
獻詩曰

於穆聖皇綏懷兆民端本自家篤於周親恩沛義洽如
煦春陽至和冲融發為禎祥禎祥伊何厥惟騶虞產於
王國惟皇德符王馴致之獻於帝庭素質玄章雲舒霧
凝帝乃觀焉爰戢其爪爰言究之踐非生草吁嗟騶虞
外何其威內何其仁匪苞而鳳匪角而麟吁嗟騶虞曷
為來哉王拜稽首皇則召之皇之仁民淪膚洽肌弘暢
旁達物以不疵皇之孝友本乎至性萬邦咸懷物以類
應皇帝曰俞惟王信恭王乃麟趾奚必騶虞皇帝曰吁

凡百在位惟德召和匪物其瑞庶臣拜手皇帝萬壽慶
祥畢臻德音是懋

河清詩

有序

維永樂二年十有二月十七日河水清自蒲津遡韓城
凡三百里其始也紺碧蒼玄五色融液混混未定越翼
日榮光上冪冥濛相蕩和氣郁然俯而視之則奔湍歛
息化為清泚淪漪粼粼楫而游者傳相告語遠近駢集
既明年正月有司詣闕下言狀羣臣皆頓首賀皆以謂

河清者太平之應也臣退而考之傳記自古禎祥之臻必由乎人君功德宏普默符潛召而其徵應之大又莫有過於河者是故殷之頌美時周之命必曰允猶翕河時邁之詩言懷柔百神必曰及河喬嶽蓋河之行乎地中為四瀆之尊配乎五嶽河既率職則神無不歆而天地萬物靡有不寧矣故河清為太平之兆非偶然者洪惟我太祖高皇帝定天下紀元洪武之二年龍門磧下河水清由是三十餘年天下晏然清明蓋其應也今皇

上入承大統河之清亦永樂紀元之明年於乎此豈人
力所能為哉是皆皇帝陛下功化之大克承克配充滿
天地莫及神人故上帝監觀發此禎祥肇基太平以同
符高帝而並美匹休古未嘗有也夫有周詩人之於河
嶽播之頌歌告之神明其盛大如此今河清之祥昭著
倬倬其可不形之歌詠垂示萬世以傳之無窮也哉臣
謹拜手稽首而獻詩曰

河流渾渾肇自古昔橫亘萬里潢汙霆激觸乎崑崙踔

乎龍門震掉奔騰入乎無垠惟皇聖明百神效靈湯湯
蒲津河流載清始視其流混漾弗定若鑛在鎔五彩輝
映厥既清矣靜影浮空榮光上燭煜乎溶溶若挹而注
若涵而蓄元氣默融太和潛漉纖滓弗滯淵乎若澄千
峯倒浸湛乎若凝蒲津之堦幾數萬里烏翔而迴魚駭
而逝屬時載暘楫而詠之祥飈慶雲盪滿無涯觀者如
堵聞於京師京師髦倪鼓舞孩嬉列章帝庭帝弗矜異
曰匪在茲益惟寅畏於惟河流為地之紀四瀆之宗五

行之始在昔皇祖戡定萬邦惟茲河流駿發其祥我皇
繼統舊章是則河之清矣如軌合轍河之既清萬民以
寧萬方畢來物以阜成顧茲河流念我皇德東漸西被
始自家國皇之弘化功邁三五如彼河流行地東注河
流浩浩孰非皇仁淪肌浹髓品物皆春河流洋洋皇帝
壽考於萬億年為民父母

瑞應詩

有序

天命皇帝臨御萬方上下百神克享克祀越今五載嚴

恭靈承益虔弗懈乃永樂丙戌十一月庚申禋祀昊天
上帝於朝天神宮爰及九廟皇帝考妣壬戌上親奠薦
頻仰對越精神潛享百靈昭格是時天宇澄穆慶雲祥
飈蕩摩上下松栢竹樹甘露布幕鸞鶴翔舞既去復還
既畢事越二日戊辰醴泉出於神樂觀惟厥地密邇異
香旁暢玉色湛凝神光騰吐下徹厚地醇和醕冽無異
甘醴既馳報闕下皇帝御大輅率近臣往觀揚之而愈
芬酌之而彌甘汲之而不竭乃取以薦宗廟遂徧賜羣

臣始飲之耳目視聽通泰明爽沾溉所及沈痾如脫又明日復有甘露降於孝陵松柏之上枝條迫近凝綴浮動芬馨勃鬱物無比擬於是太子太師淇國公臣丘福謹率百官上表稱賀皇帝御奉天殿乃詔曰朕纘承皇考丕緒精享百神嘉瑞迭降匪朕之力惟皇考實啓佑後人然自古有道之長禎祥之集蓋惟戒慎爾羣臣尚勉輔予一人以弘膺茲休羣臣皆拜手稽首上千萬歲壽於乎盛哉臣潛退而稽諸傳記聖人之德上及太清下

及大寧中及萬靈則甘露降而醴泉出又曰王者德至在天則甘露降德及淵泉則醴泉出惟皇帝中和一德蟠極天地貫通幽明故六合之內無物不遂無神不格諸福畢臻譬之春陽既泰土脈咸奮百蟄昭蘇理之常也然此之為瑞世所共知者至於我皇運此心之誠施之萬幾庶務使四時迭行七緯順軌山川奠位雨露時降五穀繁殖庶物充牣四夷向風斯為大瑞而億兆羣黎所不識不知者也皇上雖謙抑弗及然美盛德告成

功曠古有不能自己者於是臣潛拜手稽首而獻詩曰
於惟聖皇克對於天靈承郊廟弗懈益虔弗懈益虔神
具歆止嘉符默貺爰集多祉神觀巍巍密邇郊祀有冽
者泉其甘如醴我我皇陵皇考是宮有蒼者松甘露濃
濃皎皎晨暉灼之弗晞肪疑玉綴其甘如飴布幕條柯
涵潤巖谷孰其降茲惟皇考嘉告有冽者泉澄深淵滌
酌之愈甘挹之弗寧有冽者泉凝寒弗汙虹光上騰下
徹后土我我神觀巍巍皇宮祥飈慶雲鬱乎冲冲孰醞

孰釀孰疏其源坤后帝神有開厥先乃薦宗廟乃錫廷
臣乃命往視填閩溢城既瞻既駭拜舞忻忻惟帝神聖
靈貺斯甄帝念皇考明禋精格嘉祥之來如響斯答皇
帝曰俞茲非予力惟爾耆舊靖恭乃職皇帝曰俞罔弛
于度爾尚相予益勤以懼臣拜稽首聖謨洋洋用永茲
休以垂無疆臣拜稽首皇帝萬歲永世無數萬方來格
正月六日觀靈谷寺塔影奉和御製詩二首

菩提正覺超玄間非空非有開禪關三乘頓悟是非塗

慧力高等崑崙山崑崙萬仞倚天起千派靈源走河水
一從釋迦辭王家當時如在化城裏念此羣生溺愛河
誰能隻手遏頽波化身千億入東土神光瑞氣昭彌羅
靈山遺跡久茫昧復此重來屬昭代端嚴真相妙如如
圓通法戒行在在定以生慧慧生空六根淨盡空慧同
勝緣妙果悟聞見揮手可入堂奧中遍歷諸却不能毀
緣此無始無本體執想想生見空花剎那之間萬紅紫
傍蹊巧趨易招惑如蠶吐絲自綴纒有目顧見佛日光

高照天下及萬國我皇化被極東西遐邇來貢無或迷
象犀虎豹日交致車渠火齊青玻璃醴泉甘露降巖谷
嘉禾瑞卉何煜煜皇心所眷不在茲德惟馨香自芳馥
頃聞浮屠現毫光大周八極細茫茫又看倒影入虛室
從一空中遍長廊諸相玲瓏僅盈尺陽烏陰兔會晨夕
走視稽顙衆顛仆千影俄散入千隙玉刻芙蓉金作臺
雕甍碧瓦無塵埃鸞輿降幸時往來龍章鳳彩雲間開
六丁守護百神繞虹光騰燭天皎皎由來佛法昌運符

旭日東升塵界曉

誰能解此妙圓覺彈指可以超無學
滄江俄頃息暴流水底摩泥光灼爍
旋來超至一事無緣生起滅空華如
若淪貪著出遂契焉知自性同交蘆
執持真妄不開演渾似風煙相展轉
自在那知獸踏沙綢繆甘作蠶成繭
尋常安得竟生身四法修行兩便因
往來迅速無石壁知慧善巧成陶輪
眼中何人最勝子究竟真如微妙理
惟恐浮漚尼海觀空見雲騰鳥飛起
憶昔鹿苑道初成

大興慈誓悟羣生萬法無言寧可說十方有耳皆聞聲
靈山一去幾經劫多少無明成惑業聖凡由此分兩途
終始應知纏五疊世人何幸見如來祇園春暖曇花開
微心已入虛空藏揮手直上光明臺如來前身釋迦佛
說法曾住耆闍崛西涉恒河度渺茫東踰葱嶺凌超嶽
三十二相具莊嚴一念清澄衆善兼五色金光是千日
九秋玉鑑懸孤蟾每向招提演空法四百歡聞聲颯雪
不論燥濕與蠕蠢拔及升沉并鱗甲浮屠倒影光陸離

魏我樓殿相參差多因攝受妙景出巧奪造化神工為
溫溫或或窓間度絢彩非煙亦非霧畫師縮手不敢圖
墨客操觚豈能賦春風淡蕩春日妍人間一界無諸天
生靈永樂普超濟翼我皇家萬萬年

神龜賦

有序

永樂二年十月皇上思惟太祖高皇帝成功盛德將紀
功孝陵以告萬世既得碑求硃未獲獲神龜乃併得
硃焉臣潛百拜稽首而獻賦曰

若有神物兮輪輪囷囷晶晶熒熒弗垓而治弗孕而形
不侈乎六目不矜乎三足背圓方腹肖乎陰陽昂首曳
尾若趨復止曾追琢兮是施微瑕疵兮可指是殆所謂
龜之神而賦質之特偉者耶想其冲氣陶鎔太和薰蒸
虛危晝煜灑沆夜凝走衆怪馳百靈列地位羅天經耀
赤日射紫清玄鬣茹沫素蟾奪明翽朱鳥兮褫魄隱玄
武兮降精沁寒液兮沉瑩絡微蘚兮迴縈光離離兮黯
以著色黝黝兮蒼以頽含靈和兮暢內蘊炳至文兮昭

奇英顧荆山之璞不可匹而磻溪之璜未足稱也然而
岡巒隱約榛莽蔽翳伏而弗彰孰藏之祕萬夫荷鍤孰
啓其志弗求而獲奚祥奚瑞蓋幾無感而不通物有奇
而非異於穆聖皇厥孝純備聿念皇考作配天地德超
乎百王功垂乎萬世文謨武烈奚可弗紀惟陵有碑琢
龜是負必珉與珣必完以固千崖矗矗靡中其度崇岡
漫漫靡究其所乃勤帝衷乃勞聖慮心中忡忡兮潛擬目
睽睽兮遐顧結幽思兮渺岡巒疲逸想兮馳煙霧由是

鍾山之陽龍潭之側碧樹迴春紫芝耀日神氣歟忽祥
飈蕩濤諒皇心之感孚信帝命之昭格蓋將發真石之
幽蹤而先此神龜之是出也是以衆工助喜謳歌洋洋
虞衡馳報挿羽飛章辭烟霞升明堂炫金鋪晞晨光觀
者如山忤愕徊徨稽首拜舞歡慶殊常景星爛其垂耀
威鳳雜其來翔薦寢廟歌樂章鼓萬舞聲喤喤文教敷
兮洽萬邦盡四海兮畢來王於千萬歲兮壽而昌

平安南頌

有序

安南自漢為交趾九真等郡歷唐末五代始竊據其土
宋元因羈縻之我太祖高皇帝始定天下安南貢最先
高皇帝惠顧隆洽涵育浸潤幾四十年既久以安自為
禍孽其臣黎季犛擅其政柄樹黨立朋威自己出及高
帝升遐遂弑其主陳日烺建國改元揚言陳氏絕祀請
命於朝俄陳氏遺盾有脫至京師者黎賊愧懼乞迎返
國則又邀殺諸塗緣邊數郡深被其害狙詐日積厭於
聽聞皇上不得已乃布告中外永樂丙戌秋七月戊子

朔以成國公朱能為征夷將軍總諸將兵八十萬往討之癸卯上送之江澣聖謨宏深告諭周密又一月師臨其境別將自滇池直擣富良江賊勢大窘聯木為柵緣江四百里為大舟絡置水上我師遣小艚趨出其上流因大風夜焚其舟衆兵繼至大呼奮擊大敗遂平東都進克西都不一月郡邑以次皆降附乃布告皇上所以弔伐之意交民父老流涕感激以陳氏之殲於賊也乞舉國內屬願世世勿為夷狄以外化唐虞皇上遂按漢故

事郡縣其地置官司如內屬郡凡黎賊所以威虐其民者悉除之交民大悅臣謹按大司馬九伐之法黎賊之弑主罔上蔑棄典常罪當殘滅不可以宥然其國遠在萬里又自唐末至今五百餘年矣根蟠蒂固上襲下順恬不自畏苟非皇上神略雄斷洞燭事幾高出百代曷足以建立曠世殊功如此臣潛忝職史官次第其事頓首百拜而獻頌曰

於惟聖皇統天建極肇此民彝以表四海際天極地無

有大小以生以育惟帝是賴曰迪於彛帝則受之厥惟
弗迪帝用糾之是曰天憲匪帝其私念彼交趾作貢南
土亦既有年以奠其所惟厥臣姦敢背厥常誑言盈廷
以幸冀康天鑒在茲惟帝服訓奉若天命以征弗順皇
皇聖謨百萬其師赳赳虎臣如熊如羆帝臨送之於江
之滸鳴笳沸天揮戈如雨皇帝曰吁來爾將臣汝弗究
武往弔乃民皇帝曰吁來爾統師參軍副將左右其宜
神機橫海驃騎遊擊爰及鷹揚各率乃職浩浩江流桓

桓我旅有戡其所有赫其武左江之西桂嶺之墟萬壘
雲屯萬馬電趨王師未來虎穴狼區蜃氣晝暝虺沫林
枯王師至止有風泠泠飛霜被野天開日晶堂堂之陣
道行無留偏將別趨乃斧其喉乃斫其寨颺飛火烈如
涉培塿何有崹崹富良之江有徒林立一炬宵投羣鯨
如鴨大江失據連寨齊拔乃蕩其郭乃夷其城兩都既
平四郊遂寧按兵止戈宣我皇德乃詔庶鰥載欣載悅
有羊在牢有酒盈樽延頸促武拜手轅門交人既來乃

告乃謂曰予天氓皇乃遐棄皇之宏化如天浩浩曾謂
交民而不覆幬飛章帝闕帝憫且吁曰真交民曷圖厥
初爰昔漢唐制內內地宋化失宣投之醜類今五百年
天運載旋朕惟機逢敢弗順天乃斷自衷乃擇俊乂立
之百司統以庶吏乃發洪音乃厲庶士交民困疲汝惠
鮮之母俾交民憂心孔懷於乎噫嘻聖澤洋洋自今其
始交民永康交人于于惟帝之謨交人來同惟帝之功
伐石泰山告功萬世億萬斯年永蹈成軌

瑞應麒麟贊有序

大海之西萬里外其國曰榜葛刺有麟生焉其王知其
瑞而不敢自有因望洋東北再拜而言曰茲惟海島蠻
夷之邦視在天地之內如九牛一毛其何以致此者斯
其為中國聖人宏化盛德之徵乎謹卜日遣使戒舟航
度絕島踰大洋獻之闕下于時聖情悅怡萬姓具瞻龍
顙而鳳頸麇身而龜文容與閒暇不驚不悚聲出其脰
若合乎鐘律其步趨又中乎規矩信乎其性之至仁而

有以賓服乎百獸者也於乎盛哉考之往謀禮稱四靈
麟蓋為之首而龍與鳳次焉詩詠歌文王之化其頌美
揄揚托意於麟者自趾而定而角不一言而已則麟者
誠聖世之上瑞也三代以上或在圉或在郊數然皆以
聖世而出記曰中國有聖人焉則麟至而又以麟之應
為夷狄向化之兆者此特其一端耳然而漢武之世麟
見於雍而匈奴渾邪來降宣帝時九真國以麟來貢而
四夷莫不賓服則其言信然是皆見諸經史可考證不

誣者也洪惟皇帝陛下功德盛大仁恩宏暢始於家邦
充溢乎八表故溥海內外九夷八蠻之遠無不向風順
化蓋自三代以降中國之盛未有過於今日者也夫惟
陛下盛德充積之極故融而為醴泉渙而為甘露諸福
之祥無不畢至其積盛不已則又為麟之祥產於數萬
里外而後致之闕下豈非上天以是昭彰陛下漸磨萬
國柔遠能邇之化哉蓋自周成康至於今幾二千年麟
之見纔一二耳而臣獨得遭逢其時以快覩乎曠世希

有之瑞其為欣幸可勝道哉謹頓首百拜而述贊曰

於皇聖德兮如日方升被九有兮超八紘旁暢達兮感
至靈極西溟兮麟降禎嗟麟之降兮孔神以明五行粹
淑兮匪孕而生四靈合體兮匪育而形其性振振兮含
和包貞涉萬里兮登明廷嗟麟之來兮惟聖之徵龍顧
兮球球鳳領兮矯脩九門闢兮卿雲浮參紫鸞兮陪玉
蚪賁聖文兮揚佳休千秋萬歲兮麟孰與儔麟孰與儔
兮聖澤汪汪龍遊宮沼兮鳳鳴朝陽酌丹穴之泉以為

醴揀玉山之禾以為糧擴至仁為圃兮禮以為防嗟維
爾麟兮永與翱翔後天不老兮聖壽彌昌

瑞應賦

并序

永樂十五年十一月癸丑皇上營建北京宮殿瑞光頻
見輝映殿柱之間金水河太液池冰凝結衆像千態萬
狀奇巧精妙不可殫舉丙辰之日復有卿雲五色中見
瑞光團圓如日正當御座瑞光中燦五色天花已而騰
輝上升西度宮苑映照皇上所御殿庭浮彩氤氲終日

不收其時密雲來獻瑞冰如水晶含玉者凡七與金水
河所結無以異者工師執事之人萬衆共覩莫不歡忻
踴躍既而皇上命以示南京小大臣民瞻望咨嗟都城
人士駢肩累迹交相稱慶蓋前此未嘗有也於平方宮
殿經營之始而上瑞疊臻此天意所在豈無所自而然
哉洪惟皇上功德盛大無與倫比至誠之道上契於天
聖謨之發動與天合由是三光全寒暑時四夷賓服五
穀咸登然後修禮樂明教化舉先王之道重彝倫之典

隆百神之祀惠施鰥寡之民使海隅邊徼日所出入之
地皆相安於無事熙然泰和充乎六合之間凡醴泉甘
露嘉禾瑞麥麒麟騶虞之瑞靡不畢至至於此而天地
之祥交應於上下蓋所謂以和召和者皇上盛大之德
誠有以來上天之降鑒而非偶然之故也於乎盛哉臣
覩茲盛美不勝欣踴之至謹百拜稽首而獻賦曰

欽惟聖皇御極兮乾清坤寧聿追豐鎬兮肇建兩京明
堂洞開兮玉墀彤庭煥黃居之巍巍兮凌紫府之冥冥

惟天篤眷兮屢錫嘉徵卿雲興兮郁郁紛紛變化輪囷
兮燦五色以成文祥光煜煜兮洞徹乎金門輝騰黼臬
兮儼奉獻於至尊惟體元以居正兮實厯數之方殷太
液兮淵冲金水兮沆溶冰凝結而疊起玉稜層以玲瓏
外成如意珪瓚中含瓔珞寶網竒竒怪怪殆有不假手
於良工蓋造化之自然所以符泰運之興隆神皋聖壤
兮所畜者久英猷睿斷兮所謀者深信天作地藏之有
侍恢經營布制於聖心規模宏遠兮過周成之作洛厯

數綿延兮邁商湯之景毫於以奠安中原於以威鎮幽
朔煥乎大明麗天率土一照而不遺於丘壑也欽惟聖
皇其仁如天其智如神聰明文武統一聖真續太祖鼎
新之業繼文王日昃之勤無一事不遵成憲無一念不
在生民曠六合以無外令四海以皆春際天極地悉主
悉臣興禮樂於中朝考制度以時巡熙治化兮三代返
風俗兮再淳天命兮諄諄聖子兮神孫萬萬萬年泰山不
拔之基萬萬年洪河久長之業衣裳垂乎紫宸之殿功

德鏤於白玉之牒巍巍隆隆天子之功頌曰惟聖作都
詢謀同兮惟天降祥符宸衷兮聿配豐鎬兆熙雍兮居
正體元日方中兮創業垂統益穹隆兮四方萬國長朝
宗兮

西域獻獅子賦有序

永樂十三年秋九月西域以獅子來獻雄姿詭狀傑然
殊常顧盼之間百獸悚伏前此未之見也於乎遠物之
來實由皇上德化廣被之所致非偶然者臣潛覩茲盛

美謹百拜稽首而獻賦曰

遊哉曠乎極金天之西陲厥有獸兮曰狡狴蒙蒙茸茸
勃其髯彫凜凜栗栗赫乎有威睽紺目兮星垂安繡尾
兮霞披攬蓐收之精英褫太白之神竒稜稜乎猛氣獵
獵乎雄姿聲殷雷兮含咿咿齒利劍兮切差差憤冲膺
兮欲洩怒拂脰兮莫支於是捩文豹擘玄犀攫象兕剗
熊羆養由欽技而遠逝中黃扼腕而莫窺爾乃道西極
騰瑤池踰葱嶺涉月氏東望扶桑獻之京畿於時九門

既開明堂孔暘金昊載肅商飈微飈遊於彤墀煒乎煌
煌厥有老者椎髻而毳裳再拜稽首擎拳以奉將飈沓
進退率舞而低昂曰皇至仁兮柔遠偉茲獸兮馴良見
者駭乎其未覩聞者想像而彷徨乃知遠物之來格實
由聖德之遐彰簫韶兮鏘鏘鼓鐘兮央央陪麟趾兮下
上隨騶虞兮翺翔協皇武兮符治康奠中土兮清四疆
皇風暢兮皇道昌聖壽萬億兮與天而俱長

瑞應麒麟篇

有序

永樂十二年秋九月榜葛刺國遣使獻麒麟於朝明年
秋九月麻林國復以麟來獻其狀皆與詩書傳記所稱
無以異者臣惟麟仁獸也中國有聖人焉而後至今二
國皆西海萬里之外距一歲而麟兩至焉是皇上盛德
廣覆漸被所至非偶然者臣潛覩茲上瑞不敢以嘿輒
形之詠歌為麒麟篇一首百拜上獻辭曰

皇化敷萬國賓麟之降徵皇仁若木之西桂海濱玄枵
昱然降其神歛忽下為麒與麟龍其首膺其身負以龜

文燦彬彬行中規矩聲合韶鈞生草不折何振振瑞物
之生本同氣要當匹美貢紫宸神光皎皎射太白散作
商雲成五色淋漓上與太微直駕樓船辭下國祥飈興
驚波息十洲三島相縟綿玄鰲紫虬俱辟易飄然遐舉
上神京神京大道如砥平我我雙鳳闕巍巍凌紫清瑤
樓玉殿丹霞生麟之來皇化成兩兩翱翔繞丹陛遊聖
歸昌相和而應聲有如雌雄兩神劍萬里之遠還合并
麟之來符佳蒨簫韶九奏鳳凰和鳴獅子貢西極騶虞

遊郊坰南畝之禾九穗而一莖皇之沛澤有如此萬國
涵濡皆滋榮麟之來景運昌伏靈圃偉煌煌舞堯階繹
躑躑餐以玄圃之芝房飲以瑤池之霞漿千秋萬歲承
寵光

白菴集卷一

欽定四庫全書

泊菴集卷二

明 梁潛 撰

高帝呂后論

或者謂高帝寬仁愛人乃獨於呂后以色衰而弛愛夫
託交貧賤起身艱苦一旦富貴之餘乃疎棄之獨不念
前日楚軍之間道哉高帝無乃少恩也梁子曰不然夫
高帝之知人何如其明也與呂后處者幾年矣呂之為

人獨不知之耶彼固一婦人也而其雄猜傑黠有猛士之肝腸高帝於是乎有以知吕后之心矣夫畜老人猶憚殺曾謂國家之勲臣取而族滅之無遺噍類若置中鬼然未嘗有難色后也何其忍人哉夫殺諸將非高帝之心也后也蒯徹教信以反貫高反形已具高帝猶釋之而肯果於殺韓彭耶韓彭雖夷滅而昔日感遇之際士為知己死者英態豪氣猶在目睫間也高帝中夜思之豈不一動心哉吕后是可忍也孰不可忍也高帝所

以薄呂后者不能形於言而痛在其中矣不然盧綰舊
日里閤恩猶不減乃謂至親而獨少恩哉夫觀人者不
於其所厚而於其所薄高帝於其所薄者如此矣豈得
薄其所厚哉呂后忍於韓彭者如此矣豈得厚於劉氏
哉豺狼得嗜則喋血搖尾以恣餐苟無所得則爪膚拏
毳以致猛諸將已盡其禍尋及劉氏矣故殺韓彭而諸
將懼族諸將而劉氏懼高帝亦豈與陳平謀及此哉聞
樊噲黨呂氏立命斬之用平之謀高帝至是非特為劉

氏憂亦且為平勃憂也高帝目纔瞑肉猶未寒后也曾
無一髮之蹙即謀族殺諸將今日鴆如意明日斷戚姬
今日鴆齊王肥明日殺趙王友至於無所忌憚立他人
子為帝又殺之而又立焉忍人哉后也一至此極也當
是時漢已亡矣吁高帝豈不知毒流至此哉說者謂良
平之教高帝徃徃忍小以就大晉獻之驪姬秦皇之扶
蘇高帝審之久矣然獨恨高帝之明有所未盡者焉懲
其近而不懲其遠商之亡以妲己周之亡以褒姒高帝

曷不懲此耶嫡妾之分亂於前而正家之約昧於後於是拳拳然屬周勃以安劉置周昌以重趙所謂滔天之勢已成乃欲以一手障吁何益哉

論平陽公主

唐武德六年平陽昭公主卒詔加鼓吹班劍武賁甲卒以葬大常奏禮婦人無鼓吹上曰公主親執金鼓興義兵以成大業豈與常婦人比乎遂用之梁子曰世固有非常婦人哉方唐主起晉陽入關中公主將精兵會世

民於渭北與其夫柴紹各置幕府號娘子軍氣槩能事
隱若一奇男子豈不非常婦人然竊意非常之事不可
有也苟有之非美事也禮男子生授之以干戈俎豆故
有事於天地四方者男子之常事也女子之生習之以
尾示之以綈屨之於地故有閨門之修而無境外之志
者女子之常事也妖狐晝遊人必駭視鬼魅夜嘯衆則
瞿然曾謂婦人而誇能事於軍旅宇宙間事亦良可怪
也哉高祖乃猶欲移國家有常之典以賞此非常之怪

是高祖好怪矣晉陽之役獨少此一女子兵耶夫人主
舉措雖微其流必至故禮怒蟄而勇士成市駿骨而良
馬得易曰履霜堅冰至言漸不可長也未幾而武后出
性明敏通書史易唐祚自為皇帝斬伐號令天下者二
十餘年於是乎謂之真非常婦人者焉而向之跨鞍對
陣者又不足道也自是終唐之世非常婦人居多焉詩
曰哲夫成城哲婦傾城吾觀高祖經營之初亦異哉

劉仁軌

少府監裴舒為唐高宗造鏡殿上與太子太傅劉仁軌
觀之仁軌驚趨下殿走上問其故曰天無二日民無二
王適見壁間有數天子不祥孰甚焉上遽令剔去愚意
仁軌此言未當也夫人臣之戒君或婉其辭而意有所
在孔子所謂巽言之者也或峻其辭而無所隱孔子所
謂法言之者也仁軌此言其法言之耶其巽言之耶夫
曰壁間有數天子不祥孰甚焉者有似乎巽言之矣高
宗嗣守天位而武后制其政柄是武后亦一天子矣李

義府恣意慘酷天下之人知畏李猫而不知有朝廷是
義府又一天子矣至於武三思為周公威福之柄又窺
取之焉則三思又一天子矣政出多門不祥孰甚而仁
軌此言非此意而高宗亦不此悟也然則既不為翼言
曷不為直言也哉納約自牖因其明而投之仁軌此時
宜進言曰以銅為鏡不若以古為鏡以古為鏡不若以
賢為鏡書云人無於水鑑當于人鑑詩曰殷鑒不遠在
夏后之世隋之煬帝淫刑黷武沉湎冒色忠言不用小

人朋進盜賊旁午自度不免乃持鏡照曰好頭頸不知
為何人持去此煬帝以銅為鑑而不以古為鑑也太宗
皇帝艱難以定天下身致太平樂聞直諫好用善謀皇
后順正不預外事常曰以銅為鏡可正衣冠以人為鏡
可知得失此太宗以人為鏡不以銅為鏡也陛下誠能
以煬帝為戒以太宗為法則社稷之福生民之幸矣且
殿廷之上豈照鏡之所奸邪之情豈懸鏡可得陛下以
心為鏡勿昏以欲勿蔽以私湛然虛明可照萬事臣伏

願陛下曷去彼而取此哉不知出此乃以鏡之影為不祥謬矣

明本二十條

有序

治天下有道在明其本而已本既立則治道立矣深山百圍之木蔽丘壑而排風雲終古不拔者其本固也故善培其本則枝葉可久茂天下大器也天下之安在審其本而已書曰民為邦本本固邦寧民猶國之元氣也人之一身元氣充滿則百病不作故善治國者保其民

善治身者保其元氣古今帝王之保民治之教之而已
仁義中正民心之天理也禮樂開導國家之教化也政
刑防範國家之治具也治之與教莫非因其本然之天
焉教之以道防其心之未然也治之以法懲其形於已
然也懲之不可以太密防之不可以太疎防之疎則縱
縱則流而溺懲之密則玩玩則愒而欺溺則教不立矣
欺則治不純矣無善教無善治則民心之天理日喪而
本不立矣本不立而欲天下之安且固可得乎孟子曰

天下之本在國國之本在家家之本在身愚故以正心格物至誠一內外厚倫理為家本以躬禮讓立廉恥重學校務實學惜賢才為教本以任賢辨邪親親愛民敬天立紀綱定命令均貧富省刑法尚果斷為治本嗚呼明德所以新民也修道所以立教也詩云刑于寡妻至于兄弟以御于家邦言舉斯心加諸彼而已是則教與治非二道家與國非兩途堯舜三代之治如此而已方今聖天子在位至公至明保民之心尤切切焉立法之

意視前代為詳立教之盛視前代為優夫善政則民畏
善教則民愛苟在廷之大臣天下之方伯守令體皇上
之心兼盡乎政教之責與其使民畏不若使民愛與其
使民不敢欺不若使民不忍欺以培植乎天下之命脈
元氣則根本永固社稷永安生民無窮之福也區區之
愚見如此敢論述於後以俟知者擇云

家本五

正心一

董子曰人君正心以正朝廷正朝廷以正百官正百官以正萬民善乎人君一心乃萬化之本源臣民之準的也故不難於治天下而難於治心焉此心一正萬事可理此心一荒百度皆弛可不慎歟彼正人之事君也存其正心以行其正志君心若正則上下一心自然如雲龍風虎氣同道合諫行言聽而治化隆矣聖學稷契伊傅周召之於堯舜禹湯文武是也故唐虞三代之盛後世莫及焉彼邪人求售於其君也蘊不正之心惟欲逞

其志以圖己之富貴故逆探君心密窺其隙先意而迎
乘機而投私惠小節幸而一微中則大奸巨蠹漸以肆
焉人君未之覺信而任之則正人日疎小人日進黨引
類附蠅營狗苟此倡彼和牢不可破則治道隳矣政柄
一落鮮可復收如漢元帝之於恭顯唐玄宗之於李林
甫宋神宗之於王安石卒誤國家卒禍生民卒遺譏萬
世也治亂之原實根於此可不戒哉是故人主之心當
惺惺自持時加檢察真誠不容一毫之偽至公不使一

物之私持守不至俄頃之間當極仁恕以自居極坦夷
以接物極廣大以容衆一念弗正痛克猛省勿謂其隱
而縱之滋根蟠蒂結則不可拔矣勿謂其微而怠於防
潰隄決渠則不可遏矣故自微而檢之易為力既放而
收之難為功也昔宋太祖嘗獨坐令洞開寢門曰此如
我心少有邪曲人皆見之朱子曰太祖不用言語文字
而胸中自有真太極一部故人君之心如鑑之空如衡
之平可燭萬幾

格物二

人主之格物不可無學問之功所以考往昔之是非為今日之龜鑑視前代之得失作後世之楷模也唐宦者仇士良教其黨曰天子慎勿使讀書親近儒生彼見前代興廢則吾黨疎斥矣奸人之用心專欲愚其君則為人主者安可以不讀書窮理哉然當慎擇夫邪正之道而留心焉苟留心於道德性命之原則知日增見益廣德日修而治道隆矣苟留心於異端他技之末則用之

於政無益於治道為之於身徒弊乎精神傳之於後世
不足為功業而治本乖矣昔程子在經筵嘗曰君德成
否責經筵時政得失責宰相夫時政之於君德猶水之
源木之本也欲其流之清莫若先澄其源欲其末之端
莫若先正其本時政之得固係乎賢相而賢相之言則
在君聽之也賢相之計則在君用之也人君識見既廣
則壅蔽自無知賢既深則用賢自篤小人之曲見私謀
安得而進之傳說之告高宗曰念終始典于學成王之

訪羣臣曰學有緝熙于光明吁學非一日可畢而德性
非一日可定擇正人遵正道自始至終由緝而熙可也
郭泰見節容而勸之以讀書范仲淹聞狄青而遺之以
左傳愛其人尤欲其學況事君以忠者又可不導其君
以學哉

至誠三

一心真實萬化之原念慮雖微鬼神森羅天地昭格故
為臣者有此心以事君則必志慮忠純出辭吐氣自然

懇惻深至足以感動君心而千蹊萬徑深防曲慮皆不足用矣為君者有此心以待人接物則自然坦易平直疑忌間隔自然不生而凡深憂過計亦無所用矣故至誠之道大而天變之可回小而豚魚之可信微而僕臣妾御之委其心下而匹夫匹婦之得其情以之而事宗廟則精神自相流通以之而臨朝廷則念慮無有隱伏以之而禦詭詐則詭詐之情將自窮以之而待智術則智術之技無所發故中庸曰誠能動物先儒又曰誠無

為幾萬物夫萬物莫不自有實理以吾實心而行之則萬物可動也故實理之所在不待於有為有所作為則非至誠矣昔人有言於唐太宗曰執理不屈者直臣也畏威順旨者佞臣也願陽怒以試之太宗曰朕方以至誠治天下不為也夫詐行於己將何以動物徒勞其心而不得其理也然太宗欲屬大事於李勣而左遷之則猶有不誠者焉而李勣聞命即行則亦有以窺太宗之心矣故君臣之間洞燭以肺腑相照以肝膽相激以恩

義則中材之人皆可使為君子之行苟貌定而心不然
外諾而中不許上之心非真實則下之心懷猜疑如此
雖曰仁義道德之士莫不愛其君亦將無由安其身無
自效其忠矣故作天下之士氣尤在於至誠

一内外四

善乎諸葛孔明之言曰宮中府中俱為一體陟罰臧否
不宜異同使内外異法也夫國之本在家豈可自為偏
私使内外異法哉一念之偏苟積而萬物之理莫正一

竇之涓滴不塞則將為洪波寸薪之餘燼不撲則可以燎原易曰履霜堅冰至言陰柔之長有其漸不可不慎也六經所稱述漢唐宋之興廢可以鑑已故嘗論夫君道配天后德配地天無不覆不私于一物也地無不載不偏於一物也君以治外后以治內法乎天地順乎陰陽也天尊而地卑陽動而陰靜靜則無所為卑則無敢抗故君無所不為后則聽順於君焉君不敢以自私一聽之大公至正之法焉僕臣侍御雖甚愛之婦寺宦妾

雖甚憐之一有弗正不得以私恩而蔽之何則法不可
徧而公不可掩也然則居疑丞輔弼之任者豈可曰君
之家事臣不敢干於外哉譬如一家之中父母所作苟
或未當為子者當曲盡其誠起敬起孝思所以平格婦
寺宦妾苟不守其分以干於正以犯乎禮尤當及時匡
正無使至於縱恣不可救也如一家之中婢妾女子行
其非間得罪於父竊柄於母為之子者尤當再三白父
直逐去而後可毋使失節於宗族起怨於親戚遂使豪

奴悍僕盜鎖鑰啓局竊契券以招外侮以為亡家之本也又如人之一身寒暑傷於外者藥之必易癰疽結於肺腑者療之必難若又無良醫不峻其戒約聽其耽嗜於酒色慘酷於滋味而後砭其肌膚灸其肢體徒盡其心而無救於敗何益哉

厚倫理五

五常之道本乎天理具於人心人之所以為人者以其有此也君之所以為君者以其職此也故人心不可一

日而無此理天下不可一日而無君六經所載莫非此
道周之衰其道乖孔子作春秋以正名分亂臣賊子懼
而天下一治焉是則治亂之原在此矣故古之有天下
者未嘗不以厚倫理為先焉堯命舜以慎徽五典舜命
契以敬敷五教禹之佐舜也汲汲焉以三事為務而三
事則以正德為首成湯建中以表正萬邦中即此理也
武王建極以惇典庸禮極亦此理也德莫高於堯舜功
莫大於湯武而所以治天下者舉不外於此蓋以為天

以是理賦於民使民不失此理則君之任也故曰天地萬物父母亶聰明作元后元后作民父母民不得縱欲以敗是理徒有君焉耳一日無君則戕賊奸宄並作民無以安其生縱而不治則夷狄而已矣禽獸而已矣故並立乎天地之間者君與此理也嗚呼天理之在民心亶古至今不可滅也斯民也即三代之民也富而教之豈非民之所以賴乎上哉作而興之躬以導之漸摩之以歲月防範之以教化維持之以廉恥夫夫婦婦父父

子子近而兄弟之親旁而故舊大臣遠而四海萬邦皆有待於人君之推恩焉孟子曰親親而仁民仁民而愛物詩云刑于寡妻至于兄弟以御于家邦自三代以至於今其興廢靡不由茲者也慎之慎之

教本五

躬禮讓一

孔子曰能以禮讓為國乎何有夫讓者理之實也言以禮之實為國則何難之有於乎干戈鈇鉞可以取天下

而不足以治天下慶賞黜罰可以治天下而不可以定
民志尊卑貴賤可以定民志而不足以善民心欲善夫
民之心者惟在於躬行禮讓焉譬大河之水決之為渠
疏之為溝散之為澮蓄之為澤塘皆足以為
利苟壅而不導則懷山阜圯城郭汙稼穡漂室廬奔激
衝射泛濫汨沒無不為害矣故水可導而不可遏民性
亦猶是也善導之者因其有恭敬辭讓之心使之曲折
周旋於事親敬長之節升降拜起於籩豆罍爵之間乖

爭凌犯之風不作而和順從容忽不自知其造就之渾
化也不善導之者使之積而為怒目疾視之勇挺而為
奮袂攘臂之習放而為醉裸忘形之非或委而為頽墮
或靡而為燕安或卑而為佞諛或蕩而無所羞愧或忍
而至於殘刻皆率先之不謹也天下之人豈有不善之
性哉在乎上之人導之何如耳誠能躬禮讓於上薰蒸
陶鎔俟其自化漸摩涵養俟其自成積之以久俟其透
徹周遍身與之相安事與之為一淪肌浹髓而禮樂興

卷二
矣宋胡氏有言人君躬行於上公卿表式於下以明習
人倫為要此三代教化之實也吁世有古今理無古今
心無古今教化之實行三代之治決可復

立廉恥二

善乎管子之言曰禮義廉恥國之四維四維不張國乃
滅亡嗟夫廉恥乃國家之所以防民欲也禮義不興則
廉恥不立廉恥不立國家之大患彼貪墨諂諛頑鄙
鈍者雖堯舜之世豈能必其無一人哉惟堯舜之世教

化行故禮義明禮義明故廉恥立彼貪墨諂諛頑嚚鄙鈍者雖有之不能惑衆不能亂俗不能妨賢不能病國也內而三公暨百執事外而牧伯庶尹莫非忠正盛德之賢清修偉節之士故在下者雖有無恥之資恒不得施其無恥之技三代之盛皆用此道秦之亡在乎廉恥之不立也夫民之所以尊君親上而效死於節義者徒有詩書之道以立君子之行以明小人之志焉耳烏有詩書可焚而君子可坑乎哉詩書之道廢則君子小人無

以辨矣故秦之亡極其速漢之興至文帝躬行長者開
遊學之端公卿大夫風流篤好恥言人過而漢之治庶
幾成康之盛殆成帝之後王氏竊柄上下之間佞諛成
風然終不足以亡漢者以文帝躬行之德未泯也光武
一呼四方忠節之士爭起而輔之而激濁揚清之道光
武有焉明章之世尤知尊禮師傅故炎祚雖微士氣益
厲迨多士云亡漢社遂屋由是論之有道之時正人揚
於朝而無恥者格其心顛覆之世小人肆其威而君子

屯其澤威肆於小人者法必亂澤屯於君子者國必亡
董子曰量才而授官錄德而定位則廉恥異路賢不肖
異處矣夫用君子可也而小人亦用焉退小人可也而
君子亦退焉如是則賢不肖混淆民固未知君子之決
可為而小人之決不可為矣民無定向俗何由美夫三
公六卿天子所改容而禮貌之者也固不可輕進而亦
不可輕棄惟賢則立之於位既獲罪則退之以禮所以
重朝廷而習見衆庶此賈誼所以言之於文帝也然則

為今之急務莫若待君子以有禮置小人於無用不妄
尊賢不濫罰惡則為善者有所恃而不懼於非辜為惡
者有所懲而不得為僥倖則人人改行率德知所羞愧
矣

重學校三

不素養士而欲得賢譬猶不耕而待穫不琢而求文不
可得也易曰聖人養賢以及萬民夫養民莫先於養賢
養賢莫大乎教化教化與賢士同一消長賢士與治道

同一倚伏教道明則賢士衆賢士衆則治道得故有意
於治道者必重夫學校焉論語曰既富矣又何加焉曰
教之孟子曰飽食煖衣逸居而無教則近於禽獸聖人
之憂民未始不有以教之者三代治道之隆係乎人材
之盛人材之盛係乎教化之本原素立也漢帝之興東
征西伐戈未及投而過魯一祀有耿其光唐太宗削平
僭偽大召名儒累幸太學是二君者皆曠世之英主也
方其偃武之餘不暇他及而切切然知尊聖人重禮教

者豈有他哉誠以天下之治有待於賢士故浚其源以永其流溉其根以俟其實也向使漢之文帝唐之太宗得三代之真儒如孟軻氏者居中國而授之室養弟子以萬鍾之祿上則人君師之而不臣下則公卿大夫躬率先以受教以周孔之道而易黃老之言以修齊之術而去詞章之陋以誠意正心之要而黜其好大喜功之心則唐虞之治又何以過之哉雖然三代之學皆所以明人倫也人倫明於上則小民親於下若夫審科第之

多寡以驗教導之能否視文詞之優劣以定祿位之高
下則於性道德之原必不講矣以華藻為高致以質
實為庸愚以力行為虛文以才幹為先務則明德新民
之功必不究矣故所重者在此則所輕者在彼矣所務
者在此則所趨者不在彼矣此三代之教所以異乎此
方今朝廷教養之意超軼前代為之學者固當知所以
為學矣選天下之真儒以師表太學擇太學之賢士以
分教四方德行文藝本末兼舉務收遠效不求近功此

今日之急務

務實學四

朝廷欲得真實之才當先去夫華藻之學天下之大豈無實行之士哉在乎上之人教之養之取之何如耳教之必實養之必素取之不苟則真實之材得焉成周大司徒以鄉三物教萬民而賓興之先之以六德次之以六行參之以六藝莫非詳於行實切於日用者其教之可謂實矣自家塾而黨庠而遂術而國學禮樂詩書絃

誦舞咏開導之也周防範之也至動盪鼓舞之也有節
其養之可謂素矣命鄉論秀士升之司徒曰選士自選
士之秀而升曰俊士自俊士而造士由造士而進士論
定然後官之任官然後爵之位定然後祿之不苟虛名
不求近效其取之可謂詳矣教之實則學無不篤養之
素則德無不周取之詳則不材者無所進自鄉舉里選
之道廢而後世教養之方取士之法不可復古矣然漢
取士諸科猶云近古至隋一變而為科舉歷代守之天

下學士靡然從風競浮文以勝質侈虛詞以勞心刻永
為工鏤朽為巧根本之學盍亦用心焉哉故以愚見觀
經義論策以為取士之一端則可也以為天下教養之
格律則不可何則天下之材器局不同資性各異恭慎
質實者或短於材華文思新奇者或涉於輕佻操守有
餘者智謀之不迨正直過人者材幹之少虧近又觀之
北方之學者或長於講說而疎於詞章南方之學者或
略於性命而優於文詞長短巧拙固各不齊豈能舉天

下不齊之材而使之盡為文章之士哉措之政事行之
事業固不可用無學之人然飾詞於虛夸者非學也又
何益於實政且能經義者謂之成效不能經義者謂之
不成效愚見不成效者固不少而號為成效者未必盡
通經義悉曉古道也朱子曰自隋唐專以文章取士而
尚德之舉不復見矣積至於今流弊已極其勢不可以
不正然則何苦而舉天下教養之費以循積久之弊而
不圖實效也歟成周三物皆非文章孔門四科各因其

材為治如成周為教如孔子亦云可矣今欲使鈍者皆
銛質者皆文則是將求勝於三代求過於孔子矣吾未
見其能然也朱子之說不得行於當時而積習之弊曾
未改於往日故愚見以為宜於當今而垂之永久者莫
若漸改隋氏之陋稍復成周之制以三物之教而為四
科之設豈不為一代之盛典哉若夫擇師道之賢盡董
勸之勤則又在夫上之人焉有二程之教而後有二程
之學者有安定之教而後有安定之門人倘曰可以行

之風俗教化或者其有小補云

惜賢才五

賢才之在天地間良不多得也培植之勤而後成旁求之周而後得相得而後用不相忌而後成功明君知其然故保養賢才如護四體漸摩之薰陶之浹洽之以恩澤鼓舞之以教化董之以躬行之術其培植之可謂勤矣然而不見用焉猶虛器也於是擇而用之而不能得其尤異者則又察之於疇人之内考其言詢其事觀其

進退然後用之求之可謂周矣及其用之也不稱欲焉
吾所欲為往往違意而逆心然後又察之不與於事而
協于衆情且有功焉其心專一忠愛久著誠賢材也於
是歡然相得而後能成功進一賢才如是其難何可不
加之意以愛惜之也疎之恐其太逼非任賢之道也疑
之恐其太專非任賢之道也聽之惡其太切非任賢之
道也一行之或玷也察之必加詳不委之於法焉一語
之弗侔也察之必加詳不委之於法焉一事之弗當也

察之必加詳不委之於法焉短之者交至恐其媒孽之也毀之者無實恐其攬撫之也公道以自持或仇怨之者至矣正直之不阿或羅織之者至矣故明君往往推誠以待之肝膽相照肺腑洞燭小人自無罅隙之窺瞰君子得以展布其四體矣且天下之小人無窮而天下之賢才有限也今日退一小人明日退一小人退之不己小人自然無幾矣今日去一君子明日去一君子去之不己則君子自然無幾矣小人得志則中材以下可

以為小人者或變而為小人君子得志則中材以下可使為君子者或慕而為君子世道之升降其幾又在此焉然則進退之際可不慎歟譬之種樹者自萌蘖而拱把自拱把而連抱勤勞非一日之功求用在十年之後高山峻壑萬牛引重千夫助呼致之不易也乃一旦棄之以寸朽聽慵奴惰僕薪之以斧斤曾一念前日之辛勤哉故賢君每思培植之非易自然愛惜之深至

治本十闕五條

任賢一

治天下之先務在於任賢而已使三公得職者天子也使六卿得職者三公也至於使百職得其人者則又在乎六卿之與天官也以一人斷之則可以一人理之則不可故人君勤於求賢而逸於得人焉夫端表則於六曹之地者非三公乎三公所以贊畫天子以進退天下之賢者也天下之治亂在衆職衆職之得人在天官天官之得人在三公與天子故三公注意於天官天官注

意於衆職吁知人至難也明有所不照知有所不及以
張柬之之知而處武三思不如薛季昶以司馬君實之
賢而知王安石不如呂誨則廣覽衆聽又用賢之先務
焉故天子之體當委任而責成功所委者當則所用者
精苟衆職弗理咎在六卿六卿非賢責在三公臺諫可
得而言之天子可得而察之公論可得而退之天子常
擇三公三公常擇六卿六卿常擇衆職大綱舉於上衆
目理於下用賢之道得矣

辯邪二

李德裕曰正人指邪人為邪邪人亦指正人為邪在人
主之辨自古人君之用邪佞未始不以為忠良也其棄
忠良未始不以為邪佞也漢武帝明君也以公孫弘為
賢相而黜董仲舒之正學宋真宗賢君也以王欽若為
厚己而黜寇萊公之梗直彼二君者猶然何況夫唐之
德宗不能覺盧杞之姦邪哉故君子之退小人必因君
心之明小人之排君子必由君心之惑夫啓君心而使

之明者君子難為功盡君心而使之惑者小人易為力
君子之事君也君心所欲必不順而從恐陷君於非禮
也君心所向必不阿而逢恐陷君於非義也其愛民之
心常勝故未肯剥民之利以市寵其憂社稷之心常切
故不能循君之意以固位其畏名節之心常在故不能
竊君之位以苟祿其慮事也周而密其忠愛也實而深
不可誘以利不可屈以勢其肯為佞諛以要君也哉內
不懷阿附之心外不為諂諛之行自非君之知己其勢

必疎疎故小人之排君子也常易小人之事君則不然
常有以窺夫君之心思所以中其欲默揣其機之未發
逆料其意之將萌君意所在常先事而迎君心所向輒
乘間而入君所惡也則窺密而致毀君所好也則洒顏
以為譽意在黷貨則竭民膏血而不顧意在窮兵則危
國社稷而不恤意在重刑則怨入骨髓而不問或以色
慾或以土木或以封禪或以神仙思中君之欲以惑君
心之非以保己之富貴無不為己君心既改政柄在手

於是杜絕言路掩蔽聰明羣小而蝟集一倡而百和其勢必至於殺虐忠良屠害宗室使已之威行而人莫敢議君之勢孤而已日見親又其甚至於人君父子夫婦至近之地其情有不得相通者吁可畏哉故小人一進鮮有能退之者自非人君能辨之於早後將噬臍莫及矣唐玄宗末年天下大亂乃悔曰吾不用張九齡以至於此遣人祭之於曲江夫何益哉漢之恭顯唐之李林甫宋之秦檜凶虐令人切齒當是時非無忠良雖剗剗

心膽其如君之不悟何然則生於漢唐宋之後者可以鑒矣

親親三

維持國本莫良於封建維持封建莫良於親親傳曰親親而仁民封建者亦帝王推親親之恩以仁民也上古制治保邦用此道焉故久而不亡其亡非封建之失也失親親之道也夫王者之有天下不敢私之分封子弟使之各保其土以寧其民為之諸侯者亦不敢私之為

天子守其土疆以保其民上下之間如木資枝幹以蔭其本根資本根以榮其枝幹枝幹剪必傷其本本根撥必悴其枝榮悴相係豈得自弊其蔭反戕其本也哉是故伐大木者必先落其旁枝毀人國者必先殄其同類先王知其然於是內外相維首尾相制內之權足以弭外之變外之勢足以戢內之姦彼有所畏而不敢肆此有所忌而不敢發長治久安之道莫良於此故曰維持國本莫良於封建也叔伯昆弟自祖宗而視之其始本

一人之身自一身而視之固皆手足股肱也居一家之內合一人之身當使其身之氣脈常相流通或壅而為疣贅或結而為癥瘕滯而為跛蹇舒而為痿痺皆其氣脈之不相流通故疾見於身不得為完身是不謹疾之過也昆弟叔父之親彼此常相知不至有猜疑心志常相通不至有間隔恩意常浹洽不至有疎忌則藩籬堅固孰敢趾其垣穴其基而毀我牆壁也歟故保封建莫良於親親也或曰周之衰諸侯相侵伐無寧時天子下

同於列國封建之失如此吁此非封建之失也親親之道不行也危而不知持顛而不知扶上則并禮樂征伐而忘之下則并禮樂征伐而竊之然猶足以久存者枝幹雖強終不足以撥其本根也及秦滅周諸侯莫顧周亡而諸侯隨之本根既撥枝從而亡勢所必至也秦懲此失列而為郡縣楚人一呼而亡秦若反鋤以振朽枝此無枝幹以蔽其本也漢懲秦失大封諸侯王又脛大於腰指大於股之病又失其中道也然有如文帝篤親

親之道吳楚之禍何自而發哉鑒亡秦而制封建懲周漢而篤親親治天下之道不能易也

愛民四

孟子曰得天下有道得其民也得其民有道得其心也甚哉民心乃天下之本國之元氣也本蹶必痿氣竭必亡失民者滅得民者昌夫自古有數百年之天下者必其有數十年愛民之實政深恩厚澤有以固結其心而不可解焉故後嗣子孫雖不免昏戾而未至於斷喪前

人之澤者其民皆不忍去蓋培養之固根本植立不可得而搖動之也故欲保夫天下者莫先於保其民書曰民可近不可下又曰可畏非民惧之以刑則愈犯臨之以威則愈慢繫之以法則愈肆愚之而愈智暴之則離遏而不通則潰惟其有可畏此其所以不可下也不下之則所畏可無嘗以周秦之事觀之周積仁日弱而歷年最久者得其民而又得其心也秦積威日強而後世笑之者秦得其民而不得其心也秦用法如雷霆視夷

三族如撥餘燼然民不畏刑刑卒不可措奸卒不可止是惧之以刑而愈犯也秦皇虎視四方威行天下三十七年可謂極矣然而傭耕之氓敢輟鋤大言而不顧是臨之以威而愈慢也罰及棄灰禁及同室內息法不可謂疎然而挾匕首於殿上奮鉄鎚於沙中者未聞有畏縮之態是繫之以法而愈肆也焚詩書烹學士以愚之而良平之徒其智出乎學士之表愚之何可得欲富其國而取及鎚銖一旦四方蜂起遂不可制暴之安可

施以六國之地入秦而六國之民智者無所謀勇者無所施目相視而不敢開其喙則又有心非腹誅之誅於是蓄憤而俱發者若鼓奔濤而決壞堤而秦莫如之何矣遏之安可為此秦之所以甚可笑也文武周公之道則不然懷之以德而民莫之犯齊之以禮而民莫之肆坦易平直而民莫之褻開其智使之盡格物窮理之道修齊治平之術節其力使之鰥寡孤獨有養通其情而同其好惡使之有所庇倚是以仁心仁政浹洽周遍民

之歸之如赤子之慕慈母雖絕衿去之亟走而從焉然則有天下者將何所懲懲秦可也將何所法法文武可也夫為國莫先於得民心愛民莫先於行實政實政莫先於用仁賢舉文武周公之道世世守行之未有不長治久安者也

敬天五

人君常存敬天之心則萬幾可理所居之位天之位也不敢怠其位者敬天也內外百辟天之職也不敢曠其


職敬天也四海萬民天之民也不敢下其民者敬天也
凡天所敘之典天所秩之禮天所命之事無不順乎天
則天意得矣書曰皇天無親克敬維親詩云敬之敬之
天維顯思夫知天之無親則不敢不敬知天道甚明則
不可不敬不敢不敬者畏天也不可不敬者知天也知
而畏之則能順乎天順乎天者必得乎民民既得矣天
下孰得而動之哉且天者理而已天人相與之際不可
以不慎爽於理者拂於天故人事之得失天道恒應焉

況人君者父乎其天母乎其地天之眷君不頃刻而忘
猶父母念子不斯須而舍一出徃之間而昊天及焉一
遊衍之間而昊天在焉蓋天體物而不遺也豈可謂其
高遠不吾察而有急急之心哉片言苟善天聽伊邇感
應之理真猶呼吸之相通者也故聖哲謀肅乂而雨暘
寒燠風應焉致中和而位且育焉此無他吾之氣即
天地之氣吾之心即天地之心也故人君興一念以敬
天其精神常與天地相為流通湯六事以自責而大雨

遂至太戊修先王之政而桑穀為祥此感彼應何其速也由是觀之天人相與之機密矣且湯與太戊豈必有乖政也哉而所值如此者如人子之所行罔有過失而父母猶時震怒以恐懼之者固使之堅定強忍不至有非心也且天意所在多非人之所知如老成之人慮事有非後生少年所識室家雖安寧而思患預防之意常先事而丁寧憂愁衣食之念嘗預期而告報蓋愛子弟之心無所不用其情也子能祇順之則父母底豫矣漢

文帝治平極盛之時而日蝕地震之變不減苟文帝不能祇順安知無咎徵之應乎惟文帝能祇順故有其象而無其應也唐明皇安史構亂之極而天變略無蓋天意稍厭絕之矣明皇卒不省悟乃至於亂也故天變之見不必皆有徵而天變之無未必不可懼苟不務修德或專行厭勝之術或故作其事以應是不惟不知天意且欲求咎徵之必應也况一陰之長嘗在陽盛之時而一陽之生嘗在陰極之日人君居極盛之時當思持盈

之不易遇亨嘉之運當思保泰之為難先事而憂則無
可憂之事矣思患而防則無可防之患矣慎終如始敬
之敬之



泊菴集卷二